



Broj: 01-06-26-022-4-II/06
Sarajevo, 15. februara 2007. godine

Na osnovu člana 42. tačka g) Zakona o konkurenciji («Službeni glasnik BiH», broj 48/05) i člana 116. stav (2) Zakona o upravnom postupku («Službeni glasnik BiH», broj 29/02), a u vezi sa članom 16. Zakona o konkurenciji, u predmetu po Prijavi namjere koncentracije podnesenoj od strane privrednog društva «Europapier Sarajevo» d.o.o., Halilovići 12, Sarajevo, zastupanog po advokatu Marić Branku, Mehmeda Spahe 22, Sarajevo, a zaprimljenoj dana 22.12.2006. godine pod brojem: 01-06-26-022-II/06, Konkurencijsko vijeće na 41. (četrdesetprvoj) sjednici održanoj dana 15. februara 2007. godine, je donijelo sljedeći

ZAKLJUČAK

Odbacuje se Prijava namjere koncentracije privrednog subjekta «Europapier Sarajevo» d.o.o. Sarajevo, radi nepostojanja koncentracije u smislu odredbi Zakona o konkurenciji.

OBRAZLOŽENJE

Konkurencijsko vijeće, dana 22.12.2006. godine pod brojem: 01-06-26-022-II/06, je zaprimilo Prijavu namjere koncentracije, podnesenu od privrednog subjekta Europapier Sarajevo d.o.o., Halilovići 12, Sarajevo (u daljem tekstu: Podnosilac prijave ili Europapier Sarajevo).

Podnosilac prijave je podnio Prijavu namjere koncentracije u skladu sa članom 16. Zakona o konkurenciji, i dopunio dana 27.12.2006. godine, a dana 02.02.2007. godine je dopunu izvršio po zahtjevu Konkurencijskog vijeća.

Konkurencijsko vijeće na osnovu podataka dostavljenih uz Prijavu je izvršilo preliminarnu analizu te utvrdio sljedeće činjenice:

- Učesnici prijavljene koncentracije su: privredni subjekat Europapier Sarajevo d.o.o., Halilovići 12, Sarajevo, privredni subjekat Hercegtisak d.o.o. Široki Brijeg, Varaždinska bb, Široki Brijeg (u daljem tekstu: Hercegtisak), fizičko lice Ante Suton, sa prebivalištem na adresi (...)***¹ u Širokom Brijegu (u daljem tekstu: Ante Suton), privredni subjekat Suton d.o.o., Varaždinska bb, Široki Brijeg (u daljem tekstu: Suton) i privredni subjekat Europapier AG, Autokaderstrasse 86-96, Beč, Republika Austrija (u daljem tekstu: Europapier AG).
- Isključivi vlasnik svih udjela u privrednom društvu Hercegtisak i privrednom društvu Suton je fizičko lice Ante Suton, dok je privredno društvo Europapier AG isključivi vlasnik svih udjela u privrednom društvu Europapier Sarajevo tj. Podnosioca prijave.
- Prijavljena koncentracija izvršit će se na način da privredni subjekat Hercegtisak proda i prenese dio svoje imovine koja se odnosi na poslove trgovine kancelarijskim i školskim priborom na Podnosioca prijave. Nakon prodaje ovih sredstava, privredni subjekat Hercegtisak bit će pripojen privrednom subjektu Suton, i kao takav brisat će se iz registra

¹ (...)*** - Podaci se smatraju poslovnom tajnom

privrednih društava. Prema podacima iz Okvirnog ugovora zaključenog između učesnika predmetne koncentracije dana 15.12.2006. godine u Beču, nakon ove transakcije privredni subjekat Europapier Sarajevo promijenit će naziv u «Europapier Hercegtisak d.o.o.» (dalje u tekstu: Europapier Hercegtisak) sa sjedištem na adresi Varaždinska 2 u Širokom Brijegu.

- Fizičko lice Ante Suton od privrednog subjekta Europapier AG, koji je osnivač i (..) **% vlasnik privrednog subjekta Europapier Sarajevo tj. Podnosioca prijave, otkupit će (..) **% udjela u privrednom subjektu Europapier Hercegtisak po cijeni od (..) **KM (..) **EUR, što predstavlja (..) **% glasačkih prava i (..) **% vlasničkog kapitala. Dakle, nakon ove transakcije privredni subjekat Europapier AG imat će (..) **% vlasničkog udjela u privrednom subjektu Europapier Hercegtisak, dok vlasnički udio fizičkog lica Ante Suton u privrednom subjektu Europapier Hercegtisak iznosi (..) **%.
- Podnosilac prijave ostvaruje godišnji promet od (..) **KM, što odgovara 1,5% udjela na tržištu kancelarijskog pribora, školske opreme i grafičkih proizvoda za krajnje korisnike u Bosni i Hercegovini, a privredni subjekat Hercegtisak ostvaruje godišnji promet od (..) **KM, što odgovara 2,5% tržišnog udjela na navedenom tržištu.
- Kupovinom dijela imovine privrednog subjekta Hercegtisak, koja se odnosi na poslove trgovine kancelarijskim i školskim priborom, od strane privrednog subjekta Europapier Sarajevo tj. Podnosioca prijave ne predstavlja koncentraciju u smislu Zakona o konkurenciji s obzirom da predmet prodaje nisu vlasnički udjeli privrednog subjekta Hercegtisak, nego imovina istog.
- Pripajanje privrednog subjekta Hercegtisak privrednom subjektu Stuton ne smatra se koncentracijom u smislu Zakona o konkurenciji, s obzirom da se ne radi o nezavisnim privrednim subjektima (član 12. stav (1) tačka a) Zakona o konkurenciji). Ovo pripajanje se smatra statusnom promjenom, odnosno samo promjenom oblika unutrašnje organizacije privrednog subjekta, obzirom da su oba privredna subjekta u (..) **% vlasništvu jednog fizičkog lica.
- sticanje vlasničkog udjela od (..) **% u privrednom subjektu Europapier Hercegtisak od strane fizičkog lica Ante Suton nije koncentracija u smislu Zakona o konkurenciji, s obzirom da u konkretnom slučaju udio od (..) **% u vlasničkom kapitalu i glasačkim pravima ne omogućava kontrolu ili prevladavajući uticaj u skladu sa članom 12. stav (1) tačka b) Zakona o konkurenciji.

Analizirajući naprijed navedene činjenice Konkurencijsko vijeće je zaključio da se prijavljena namjera koncentracije ne može smatrati koncentracijom u smislu odredbi člana 12. Zakona o konkurenciji te je odlučio kao u dispozitivu ovog Zaključka.

POUKA O PRAVNOM LIJEKU

Protiv ovog Zaključka nije dopuštena žalba.

Predsjednik

Gordan Raspudić